



Es wirdet von notten seyn/das man wyß einem zirkeltrum seyn Centrū oder mittel punctt
 zūfinden/Das macht man gleich durch den weg wie vor angezeigt das man ein auffrechte
 lini/auff ein zirkeltrum setz/thū jm also/das fürgegebē zirkeltrum sey.a.b.nun nim ein zir
 kel/vnd setz in mit dem eyn fuß in den punctten.a. vnd den andern setz ein wenig ins zirkel
 trum hyn ein/vnd reiß ein runden ryß vbersich vnd vndersich/so weit du des bedarffst/Darnach nym
 den zirkel vnd setz in mit dem ein fuß in den punctten / den dein krümmen ryß im zirkeltrum gemacht
 hat/vnnd reiß mit dem andern fuß auß dem punctten . a . runde vbersich vnnd vndersich / wo sich
 dann die zwen runden ryß oben vnd vnden schliessen/da zeuch eyn gerade lini durch/ vnnd sollent vn
 dersich so fer/du der bedarffst. Also thū jm auch auff der seyten. b. so werden sich die zwū geraden liniē
 vnden da sich das Centrum findet durch eynander schliessen / da hyn setz eyn. c. Also ist der Centrum
 zū disem zirkeltrum fūnden/wie ich das vnden hab auffgeriessen.

